

Den e prome cuartal di aña lo tin destaho:

## Construccion di condominiums na halto ta parti di e proyecto “Port City”



ORANJESTAD (AAN) – E construccion di condominiums den e area di waf na Oranjestad, ta un proyecto cu ta forma parti di e asina yama “Port City”.

Siman pasa, den un conferencia di prensa Minister Dangui Oduber, titular di turismo, a presenta e proyecto “Port City” pero no a toca e parti di condominiums.

Den conferencia di prensa di Dialuna, unda Minister Otmar Oduber cu a duna e prome informacion tocante e proyecto di condominiums, a wordo puntra si esaki ta sigui y si por actualiza e informacion.

E mandatario a bisa cu sigur cu e ta sigui y el a splica cu como gobierno nan a scoge pa traha riba e forma y pensamiento nobo den futuro, mirando cu Aruba ta yegando su limite pa loke ta trata tereno, pa bay cu construccion ha halto, y aki a bin e oportunidad pa traha condominiums di cinco pa siete piso halto, no pa bende cu stranhero pero cu nos mes hendenan.

Tin tres proyecto di edificio cu ta bay wordo proyecta, y e ta calcula cu den e siguiente luna ta bay rond af e negociacionnan cu tin entre APA y DIP, pa loke ta regarda e prijs, e erfpacht canon, etc. E ta pensa cu den e prome cuartal di e aña aki mes, lo cumenza mira movicion di destaho publico pa e proyectonan aki start.

Esaki tanto pa e parti di hotel, centro di convencion y tur loke ta bin cune manera area berde y recreacion, ademas di e construccion di vivienda cu ta bin den e tereno aki.